



Sud Bosne i Hercegovine
Sud Bosne i Hecegovine

Broj: S1 3 Iž 038069 20 Iž
Sarajevo, 23.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Vesne Trifunović kao predsjednika vijeća, Srete Crnjaka i Dinke Bešlagić-Čovrk kao članova vijeća, odlučujući o žalbi Dragana Karadarevića, Vojvode Mišića 80, 15320 Ljubovija, R Srbija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 23.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što je adresa iz njegove prijava, adresa sa koje je podnesena prijava za umrlu osobu.

Žalitelj je protiv navedene odluke blagovremeno izjavio žalbu navodeći da se uredno prijavio za glasanje izvan BiH putem pošte, ali da je njegova prijava odbijena iz razloga što je prijavu podnio sa adrese sa koje je podnesena i prijava za umrlu osobu. Ističe da je prijavljen u Ljuboviji, na adresi Vojvode Mišića 80, te da ni on ni njegova porodica nisu prijavljivali bilo koga drugog na svoju adresu. Moli da mu se omogući glasanje sa navedene adrese.

Centralna izborna komisija Bosne i Hercegovine u odgovoru na žalbu predlaže da se žalba odbaci kao nedopuštena, odnosno da se odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije BiH kojom je odbijena prijava žalitelja za upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine.

Iz stanja spisa proizlazi da je Centralna izborna komisija BiH prije donošenja pobijane odluke, provjerom i uvidom u službene evidencije, utvrdila da je Centralnoj izbornoj komisiji BiH dostavljena prijava za umrlu osobu Božu Milovanovića za koju je evidentirana promjena o smrti dana 29.08.2017. godine. U navedenoj fiktivnoj prijavi u obrascu prijave za upis birača u CBS za glasanje izvan BiH-PRP 1, u rubrici „Adresa boravka van BiH na koju će biti upućen glasački materijal“ pod tačkom 1. kao primatelj pošiljke je naveden Dragan Karadarević, a adresa privremenog boravka Vojvode Mišića 80, 15320 Ljubovija, R Srbija.

Centralna izborna komisija BiH je prilikom razmatranja prijave žalitelja Dragana Karadarevića koja je dostavljena dana 28.08.2020. godine, utvrdila da je u prijavi naznačena ista adresa boravka kao i u fiktivnoj prijavi za umrlu osobu Božu Milovanovića. Stoga je pravilno odbijena prijava žalitelja u cilju spriječavanja zloupotrebe u izbornom procesu i činjenice da je adresa privremenog boravka, odnosno adresa na koju treba uputiti glasački materijal, ista i za osobu za koju je utvrđeno da je umrla.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A

Vesna Trifunović